



Nuuk, 17. april 2015

**Kommunit meeqqanut inuusuttunullu politikkiannut meeqqanullu inuusuttunullu ikiorsiinnermut inatsisip malinneqarneranut tunngatillugu Inatsisartut suleriaasianni § 37 naapertorlugu Naalackersuisunut imaattunik apeqquteqarpunga:**

(Inatsisartuni ilaasortaq Aaja Chemnitz Larsen, Inuit Ataqatigiit)

**Apeqqutit:**

- 1) Kommunit meeqqanut inuusuttunullu politikkianni sumut killittoqarpa?
- 2) Kommunini meeqqat piginnaatitaaffiisa eqquutsinneqarnissaannut qulakkeerinninnissami Naalackersuisut qanoq iliuuseqarpat?
- 3) Kommunini inunnik isumaginninnerup iluani meeqqanut inuusuttunullu suliniutaasut Naalackersuisunit naammagisimaarneqarpat?
- 4) Maannakkorpiaq meeqqat inuusuttullu qassit angerlarsimaffiup avataanut inissinneqarsimasuuppat?
- 5) Meeqqanut inuusuttunullu inissitanut perorsaanikkut suliarinninneq Naalackersuisuniit qanoq paasineqarpa?
- 6) Kommunit aningaasarliornerminnik patsiseqartumik meeqqanut inuusuttunullu qinnuteqaatinik itigartitsinnginnissaat qanoq qulakkeerneqassava?

**Tunngavilersuut:**

Kommunit kattutitinneqarnerat 2009-mi pivoq, maannalu 2015-mi kommunit tamakkerlutik meeqqanut inuusuttunullu politikkimikkut nutarterisimarpasingillat. Tamanna naammaginangilaq, Naalackersuisullu kommunini suliamut tassunga qanimut malinnaanerunnginnerat tupigusuutigaara.

Siusinnerusukkut meeqqanut inuusuttunullu inissitanut amerlasuunut iliuusissiamik pilersaarusiussisoqartannginnera isumakuluutigineqarsimavoq, Inatsisartunilu Ilaqutariinnermut Peqqissutsimullu ataatsimiititaliamit suliap tamatuma aallarnisarneqarnissaa suliareqquneqarsimavoq. Uanga iliuusissianik pilersaarusiortoqartannginnerup kisimi unaminartuunnginnera, kisiannili meeqqanut inuusuttunullu ikiorsiinissamut inatsisip ataatsimut isigalugu kommuninit malitsikkuminaanneqarnera isumakuluutigivara.

Siusinnerusukkut meeqqanut inissitanut suliarinninneq pillugu Naalackersuisunut apeqquteqarsimavunga, akineqarpungalu meeqqat inissitat tamakkerlutik perorsaanikkut suliaqarfigineqartut. Meeqqat inissinneqarsimasut ilarpassui ilaqutariinni paaqqutarineqartarmata, ullorlu unnuarlu inissiisarfinni sulisut ilarpassui tusakkat naapertorlugit ilinniarsimasuunngimmata taamaassimassappat tupigusuutigaara. Ulloq unnuarlu inissiisarfippassuit perorsaanikkut sulilluaqaat, meeqqalli inissitat tamakkerlutik perorsaanikkut suliaqarfigineqartut oqaatigineqarnerat qularnartoqartippara. Apeqqutima ullut suliffiusut qulit iluanni akineqarnissaat kissaatigivara.